

MUSICA

NOSTALGIA

da H.

In viadi. In car. Ina cd.

Experienschas. Tuns. Odurs. Fatschas. Temps passads. Anc in schluc da la birra. Serrar ils egls. Siemiar vinavant. Avrir ils egls. Sper mai mes frar. Ils egls traglischan. Er el sa lascha tschiffar da la vusch penetrant bella. Anc in schluck da la birra. Serrar ils egls. Siemiar vinavant. I cumenza a far chaud. Emprima fermada Müstair. Ina terrassa. Tschintg sutgas. Tschintg amias. Ritschas brinas. Chavels lungs. Risadas. In chaun giappa. Nus turnain al car. Egls cotschens. Risadas. In viadi. In car. Ina cd. Nova chanzun. «Linger». Avrir ils egls. Risadas. Diesch onns spetgà sin quel mument. Uss è'l real. Mes frar ma piglia per il bratsch e ma guarda sco per dir: uss, uss taidla, mia chanzun preferida. El turna ses chau vers tribuna. Apatic. Però decidì. Ses corp cumenza ad ir cun ils tuns da la dunna da 39 onns. Verd. Alv. Oransch. Serrar ils egls. Siemiar vinavant. Ils pumers portan in vestgì alv. Ils pizs èn da pulvra. Il car è arrivà a sia destinaziun. In hotel. Ina sauna. In pool. Ina saira. Il corp sitg. Desiderescha il bletsch. In sigl. Risadas. In viadi. Ina cd. Nova chanzun. «Ode to my family». Avrir ils egls. Risadas. Sper nus ina giuvna. Chavels lungs che tanschan fin a la spatla. Moviments. Sperts. Ina rusna sa dat amez la fulla da glioud. Nunperturbà segua la giuvna cun ses moviments. Extasa. Risadas. Anc in schluck da la birra. In viadi. In car. Ina cd. In cumpogn. Betg pli vegl che nus. Regala insatge verd. Prest gratuit. Egls cotschens. Risadas. In banc. Tschintg amis. Sa stgaudar en il sulegl. Spetgar. In viadi. Nova chanzun. «Free to decide». Avrir ils egls. Anc in schluck da la birra. Vid. Sin via da refurniment fatschas. Conuschentas e tuttina estras. Risadas. Anecdotas. L'unic che ans tegna anc ensemen. Donn. Il bitger plain. Anc in schluck da la birra. Prender cumià. Nova chanzun. «Zombie». Trais dis. Passads. Il concert passà. Experienschas. Tuns. Moviments. Fatschas. In viadi. In car. In concert. Ina cd. The Cranberries.

Per **H.** aka **Adrian Stecher (23)** è musica insatge che unescha, perquai na pudess el betg imaginar ina vita senza musica. Per las PUNTS va el a la tschertga da novas bands naziunalas ed internaziunalas e rapporta da concerts, albums ed experienschas fatgas cun la musica.